

A NOSA TERRA

IDEARIUM DAS IRMANDADES DA FALA

ANO XV

A Cruña, 25 Xulio 1931

Núm. 286

AO DECORREL-OS DIAS

Estamos novamente diante d'un Día de Galicia que este ano amóstrásenos revestido d'uns caracteres que até agora non tivera.

Coincide co funcionamento da Asamblea Constituinte de onde sairán a nova lei estatal e as autonomías rexionaes. Decimos sairán porque temos confianza en que ollada a realidade da vida hespañola e as demostracións feitas por casi todas as nacionalidades hispánicas no senso de conquistar agora a súa autonomía parécenos que o bon senso impoñeráse nos homes que están chamados a facer a nova Constitución, e os problemas rexionaes ficarán resolto en aras da maior eficacia para o Estado hespañol e da necesidade de non perder esta ocasión de construír unha Hespaña legal e verdadeira, fundamentada nas naturais nacionalidades que a constituíen perfectamente libres e federadas. Si así non fora non tería a República a eficacia propia do momento e defraudaría a esperanzas que n'ela teñen depositados os pobos peninsulares. Ademais de que sería de funestos resultados para a República e para a mesma Hespaña non deixar agora definitivamente arranxado este problema que é o mais importante de cantos actualmente están prantexados. Depende d'ese feito o que a Hespaña sexa o que debe ser, un Estado grande, europeo e moderno, que cumpra a súa misión histórica ou que continúe pol-os mesmos vieiros trabucados e de resultados tan desastrosos dos tempos da desaparecida monarquía centralista.

Hespaña non pode, sinon é suicidándose, desaproveitar esta hora histórica para reconstruírse debidamente, con arregra á súa constitución natural e verdadeira. E si Hespaña seguira o camiño trabucado, Galicia que quere vivir, que arela ser libre e universalizarse, tería que orientar a súa vida deica horizontes mais amplos salvándose do naufraxio indefectible do Estado Hespañol. Esta é a verdade urxente do momento actual.

Os galegos non negamos a nosa colaboración para facer unha Hespaña nova, mais si Hespaña quere perderse os galegos salvaremos a Galicia contra todo e contra todos.

No Día de Galicia do ano 1931, no que está ventilándose o porvir da nosa terra. A emoción que sempre sentimos no día da nosa festa nacional tén de axigantarse de xeito extraordinario pol-o decisivas que son as horas atuais e tamén pol-a responsabilidade que os nacionalistas temos contraguído co-a Terra.

Fumos nós quenemos creamos o ambiente galeguista que hoxe respírase en Galicia. Nós fomos quenemos maxinamos e estructuramos unha Galicia nova e libre. Por eso agora que a nosa idea patriótica pode acadar posibilidades de feito o noso corazón brinca mais emocionado que nunca e temos ante os ollos, con toda a súa crudeza, a responsabilidade da labor realizada e da nosa actuación futura.

Días de loita, de preocupación e de traballo intenso, e poida que tamén de perigo, avéñanse para nós.

N-este día renovamos o xuramento feito diante do altar da Nai Terra dispóndonos rexamente, patrióticamente, a chegar a onde sexa necesario para ollarmos realizado o noso pensamento plasmado n'unha Galicia libre para o que non podemos negar ningunha crás de sacrificios.

Pol-a salvación da nosa Patria xuremos hoxe cumprir cos deberes que as circunstancias nos impoñan.